

Sotvaleto igl basigns d'infurmaziun

Surses: petizun pertutgont evaluaziun digl nov li per la scola primara

PIA PLAZ/FMR

■ **Avant curt è igl pievel digl cumegn da Surses decidia davart igl li, noua tgi la scola primara duess neir planisada pigl futur. Alla radunanza communal ins è voto cleramaint pigl li actual a Grava/Savognin.** Per Sandra Baltermia-Guetg ed Ursus Sonder, preschaints chella seira è rastada diversas dumondas avertas. Els on inoltro ena petizun e tschartgea igl discurs cugls responsabels digl cumegn.

■ **On igls responsabels digl cumegn da Surses evaluo tot las pussebladad?**

Per Sandra Baltermia-Guetg ed Ursus Sonder è rastada averta ena dumonda centrala siva dalla radunanza communal. On igls responsabels digl cumegn evaluo e discuto tot las pussebladads pertutgont igl migler li per ena tgesa da scola nova? La suprastanza è gia preschainto dus variantas a caschung dalla radunanza communal digls 10 da matg. Varianta egn: rastar agl li Grava e ramplazzar igl bietg actual cun ena bietg nov pigls unfants da scoligna anfignen la Gavla classa. Varianta dus: dislocar la scola a Bursa, survart la veia principala. Scu votant e votanta ins è pudia piglier cunaschientscha da chellas dus propostas cun tot lour aspects positivs e negativs.

■ **Infurmaziuns en po stgersas**

Per Sandra Baltermia-Guetg ed Ursus Sonder è las infurmaziuns stadas en po stgersas, surtot an vista tgi geia gio pigl futur dalla regiun, scu tg'els on managea sen dumonda. Cugl mettel da petizun on els pretendia alloura en discurs, tgi è gia li mesemda avant en'emda. Ella seia



Igl li resta. Igl bietg vign ramplazzo antras en project tgi riguarda er piazza da scola e circulaziun digl traffic anturn igl areal.

FOTO ANGELICA AUGUSTIN

satisfatga dallas raspostas tg'igl mastral Leo Thomann ed igl consuprastant Giancarlo Torriani vegian do. Chegl è detg Sandra Baltermia-Guetg agl telefon cun la FMR. Agl discurs vegia ella pudia piglier per cunaschientscha tgi las persunas antratschedas aint igl project, vegian bagn examinò tot las pussebladads per catter ena bunga schliaziun per la tgesa da scola nova. Sandra Baltermia-Guetg deplorascha tg'ins vegia dantant mantgato d'infurmar la populaziun sur digls

muteivs tgi on mano la fegn finala allas dus variantas Grava e Bursa.

■ **Sursto dalla petizun**

Igl mastral da Surses, Leo Thomann, è sto sursto dalla petizun. Aint igl discurs conceda el dantant, d'aveir sotvaleto igl basigns dalla populaziun da ratschever duple infurmaziuns davart igl andamaint dallas discussiuns tgi on mano la fegn finala allas propostas Grava e Bursa scu lis adattos per ena nova tgesa da scola. Leo

Thomann, scu er la petizunaria Sandra Baltermia-Guetg conferman, tg'igl discurs cugls petizunaris seia sto fitg bung ed ampernevel. Scu responsabel teira Leo Thomann igl suandont facit: «Ins vess forza savia infurmar en po oter.»

Per els, scu responsabels pigl project nova scola primara, seian las discussiuns gio siva dalla fusiun digls cumegn da Surses omnipreschaintas. Durant la davosa radunanza communal sei igl ia angal pigl li e betg pigl bietg scu tal, chegl

seia forsa er betg nia tgapia da tots. Leo Thomann conferma er tgi vegian basigns da refonder la comunicaziun an general. Actualmoint ins vegia permangs d'elaborar en concept da comunicaziun pigl antier cumegn. Agl avigneir less igl cumegn ponderar scu tgi el duess infurmar la populaziun davart igl stadi digl project per ena tgesa da scola nova.

■ **Salouf scu provisorio**

La proxima fasa digl antier project scumainza gio. Concret vogl ossa per lacher concepeir en project detaglea tgi riguarda igl bietg da scola, inclusiv piazza da giuier, parcadis e l'organizaziun dalla circulaziun digl traffic anturn scola. Averta è er anc la dumonda, noua tg'igls scolarets e las scolaretas von a scola pigl taimp da construcziun. Cò è venavant la scola vacanta a Salouf aint igl center scu provisorio. Ins na vegia betg anc calculo igl costs per en tal provisorio, pero è Leo Thomann digl meini tgi fiss egna dallas variantas las pi bunmartgedas. Tge tgi niss a custar duple tgi oz, seia igl transport digls scolars.

■ **Urari ambizios**

Schi vo tenor igl mastral Leo Thomann, duess capitar l'amprema badigleida cugl cumanzamaint dallas vacanzas da stad 2022. El seia pertschert, tgi chel termin seia fitg ambizios. Gio durant la davosa seduta da suprastanza ins è sa fatschainto cun las dumondas per screiver or igl project. Decisiuns davart igl proceder concret, dattigl dantant anc nignas. Scu tgi Leo Thomann declera, ins vigna ad infurmar la populaziun pi spert tgi saro decida scu tgi la planisaziun digl nov bietg da scola vigna organisada.

Treis veterans alla testa

Surmeir: teir campester 2021

GION NUTEGN STGIER/FMR

■ **Aint igl district da Teir Alva on 155 tiradours e tiradouras tratg igls 18 colps digl teir campester. Sen la distanza da 300 meters on treis veterans sagetto igl pi precis cun l'arma da militer. La distanza curta gudogna en gioven.** Avant en onn è igl teir campester gia li set emdas pi tard tgi usito, chegl perveia da covid-19. Da preschaint è chel gia li scu adegna alla fegn da matg. Aint igl Grischnon on tratg, sen la distanza da 300 meters, 2095 tiradours e tiradouras igl

teir campester. Chegl èn 337 daples tgi anc avant en onn. Cun la pistola on 913 participants e participantas tratg igl program da 18 schozs, sainza provas. Cò schea igl augmoint tar la partecipaziun tar 110 dels. An Surmeir on 155 omens e donnas sagetto igl teir campester, chegl tg'èn 35 daples tgi igl 2020. Vurdo cantunalmèin è reuschia a dus tiradours da trer cun l'arma da militer 90 igl resultat maximal da 72 puncts. Chegl èn Andrea Stiffler (Tavo) gio per la terza geda igl maximum e Daniel Cabalzar (Castrisch). Sen la distanza curta cun la pistola d'or-

donnà è Arthur Bärtsch (St. Antönien) tratg 18 dieschs da fila e fatg igl maximum da 180 puncts.

■ **Dus tiradours cun experientscha**

Nign resultat maximal ègl do a Crappa Naira ed a Rona sen la distanza da 300 meters. An general è nia sagetto bagn tigl teir campester 2021. La quota da cranz è fitg bunga cun 69.5%, detg oter madema scu la media grischuna. Fatg 69 puncts è scu unic Beat Bütikofer, en tiradour digl cantun Berna, tg'è commember dall'Uniun da teir Alva. En punct pi

pac è sagetto Gila Cadotsch (Savognin). Scu igl victour è er el en veteran (annada 1953) e gio decennis en tiradour passiuono. An Surmeir è Gila Cadotsch er gio gudagnea igl teir campester ed er igl teir Banadetg Fontana. Chest onn è el mantgato angal per en punct da star igl pi sensom igl podest tigl teir campester. Igl matscheur è ainten la regiun Alva sur onns egn digls miglers tiradours, cun aveir savens success tar teirs cantunals, federals e regiunals. Igl madem ins dastga er deir da René Frauenfelder (Mot). A Crappa Naira è el tratg dumengia pas-

sada tigl teir campester 68 puncts e cumpletto igl podest. Scu Beat Bütikofer e Gila Cadotsch è er René Frauenfelder en veteran da teir. El s'angascha fitg pigl sport da sagetter e cunzont er per la Societad da teir Mot. Vetiers vign tg'el è er en tiradour tg'ins catta savens davant ainten las rangaziuns, cunzont chellas digl teir campester. Fatg 68 puncts on er Gino Ardüser (Casti) e Johannes Tomaschett (Filisour). Tots dus èn tiradours e catscheders passiuons. En palmarès tgi sa lascha mussar on els an spezial cun trer adegna fitg ferm tigl campiunadi grischun da gruppas e chegl mintgamai cun lour quatter ameis-tiradours. La victorgia da Dominik Oberli (Barvogn) sen la distanza curta è bagn ena sorpresa. Igl gioven da 23 onns è tratg 169 puncts ed obtignia en bung resultat. Betg tratg a Rona sen la distanza da 25 meters è igl matadour local Enrico Cola tg'ò fatg tigl teir campester gio ples gedas igl maximum da 180 puncts.

Teir da gruppas cantunal – nignas gruppas surmiranas

Dallas seis gruppas dalla Val Alva e da Surses èn nignas sa qualifitgeidas per l'amprema da treis rundas nazionalas. Ena sorpresa è bagn tgi digls Tiradours da sport Alva è betg ena suletta gruppa ple dalla parteida. Igl davos onns èn adegna stadas aglmanc dus gruppas da chell'uniun agl final grischun a Coira. Scu gio gl'onno passo è chel er da preschaint betg gia li perveia da covid-19. Dalls 74 gruppas digl cantun tg'on sagetto la sagonda runda grischuna èn sa qualifitgeidas 34 gruppas per l'amprema da treis prerundas svizas. Scu gio menziuno, da Surmeir betg egn. Disfurtegn è bagn gia la gruppa Alva Tiaun cun mantgantar angal per pac la qualificaziun svizra ainten la categoria A, chella cun l'arma da standard. La gruppa dalla Val Alva è neida 13avla da 21 gruppas. Da chellas restan 12 venavant anc ainten la concurrenza.

Gia nignas schanzas da cuntinuar cun l'occurrèinza on alloura las otras tschintg gruppas da Surmeir. En success ègl pero do tuttegn ord vista da Surmeir. La gruppa da Rothenbrunnen, campiun svizzer 2019, è gudagnea la categoria D, arma da militer 57/03. Commembers da chella gruppa èn cun Franz Josef Plaz e sies fegl Kevin Plaz er dus tiradours surmirans. Bab e fegl èn uriunds da Savognin, sesents èn els aint igl cantun Argovia. Er per els dus cuntinuescha la concurrenza da gruppas. Da supponer è tgi la gruppa da Rothenbrunnen vo eneda duple agl final svizzer a Turitg, er schi èn da trer anc treis rundas nazionalas. La categoria A è gudagnea la gruppa da Favogn e tar la categoria E, arma da militer, sa nomna la gruppa victoura. Castrisch, ena gruppa tg'è davantada ples gedas campiun svizzer.

Rangaziun 300 meters

1. Beat Bütikofer, Farrera/Hünibach, 69 puncts, 2. Gila Cadotsch, Savognin 68 puncts, 3. René Frauenfelder, Mot, 68 puncts, 4. Gino Ardüser, Casti, 68 puncts, 5. Johannes Tomaschett, Filisour, 67 puncts, 6. Reinhard Plank, Lantsch, 67 puncts, 7. Ivan Sgier, Tinizong, 67 puncts, 8. Benno Gruber, Farrera, 67 puncts, 9. Edwin Candrāja, Mot, 66 puncts, 10. Walter Gubser, Barvogn, 66 puncts, 11. Claudio Brazerol, Farrera, 66 puncts, 12. Roger Janett, Tinizong, 66 puncts, 13. Nicolo Nobs, Filisour, 66 puncts.

Rangaziun 25 meters

1. Dominik Oberli, Barvogn, 169 puncts, 2. Curdin Nicca, Savognin, 168 puncts, 3. Gino Gubser, Barvogn, 166 puncts, 4. Daniel Buschauer, Filisour, 166 puncts, 5. Domenic Jäger, Beiva, 165 puncts, 6. Claudio Brazerol, Farrera, 165 puncts, 7. Michael Klein, Tinizong, 165 puncts, 8. Filip Dosch, Cunter, 164 puncts.



Eneda duple tranter igls miglers tiradours: Gila Cadotsch.

FOTO GION NUTEGN STGIER